

Approbaziun dil niev reglament

Uorden da fatschentas
per la suprastanza communal e per l'organisaziun
operativa

M E S S A D I

dalla suprastanza communal al cussegl da vischnaunca


Preziau signur president
Preziadas dunnas cusseglieras
Stimai signurs cussegliers

1. Situaziun da partenza


A caschun dalla seduta dils 13 da settember 2024 ha il cussegl da vischnaunca approbau la nova organisaziun communal (model da departaments) cun incaricar la suprastanza communal d'elaborar il reglament corrispundent. Quei reglament secloma «Uorden da fatschentas per la suprastanza communal e per l'organisaziun operativa» e remplazza il «Reglament per la direcziun communal».

2. Model da departaments

Entas l'introducziun dil model da departaments croda la direcziun communal sco definida el «Reglament per la direcziun communal». Entas quella midada fundamentala eis ei necessari d'abolir quei regulativ e d'elaborar in niev reglament che regla las cumpetenzas e las obligaziuns davart la nova organisaziun communal cun il model da departaments. Il niev reglament «Uorden da fatschentas per la suprastanza communal e per l'organisaziun operativa» sebas sin igl organigram presentaus al cussegl da vischnaunca a caschun dalla seduta dils 13 da settember 2024:



El sequent entginas explicaziuns davart las differentas terminaziuns dil model d'organisaziun:



3. Niev uorden da fatschentas

Sebasond sin art. 43 e 46 al. 3 dalla constituziun communal vegn la direcziun operativa organisada daniev sut il model departemental e buca pli sco tochen dacheu sut il model da direcziun. Tenor art. 36 al. 1 d) approbescha il cussegl da vischnaunca quest «Uorden da fatschentas per la suprastanza communal e per l'organisaziun operativa», che reglescha las cumpetenzas finanzialas e la regulaziun da suttascriber.

La midada dil model d'organisaziun naven dalla direcziun sin in model da departaments duess surtut possibilitar in tractament da fatschentas a moda efectiva, denton cun ina clara definiziun da cumpetenzas e responsablads. El sequent entginas midadas da muntada en relaziun cun il model da direcziun:

Suprastanza communal

art. 4 Cumpetenzas finanzialas

Model da departaments:

Cumpetenzas finanzialas vegnan delegadas als differentes departaments resp. spartas.

Model da direcziun:

Cumpetenzas finanzialas ein vegnidas delegadas alla direcziun.

art. 6 Giunta

Model da departaments:

La suprastanza communal sa formar giuntas che sorprendan incaricas specificas.

Model da direcziun:

La direcziun ei stau in gremi che ha decidu davart differentas incaricas.

art. 8 Delegaziun dad incumbensas

Model da departaments:

La suprastanza communal sa delegar cass generals ni singulas incumbensas administrativas che vegnan attribuidas entras lescha ni ordinaziuns als caus dils departements resp. allas spartas corrispundentas ni all'administraziun.

Model da direcziun:

Enumerau specifics pensums ed obligaziuns dalla direcziun.

Direcziun operativa

art. 10 Caus da departament

Model da departaments:

Il caus da departament (commembers dalla suprastanza communal) survigileschan tuttas incumbensas sin scalem strategic. Els defineschan las fatschentas per las sesidas dalla suprastanza communal ensemen cun il menader da sparta (scalem operativ) e presentan quellas per regla al cussegl da vischnaunca.

Model da direcziun:

La direcziun ei per regla stada responsabla per las fatschentas che vegnan tractadas en suprastanza communal.

art. 11 Cader operativ

Model da departaments:

Definiziun dil cader e dallas sedutas informativas denter las differentas spartas.

Model da direcziun:

Haveva negin cader.

art. 12 Menaders da spartas e partiziuns

Model da departaments:

Definiziun e reglamentaziun dallas incumbensas, responsablads e cumpetenzas dils menaders da sparta e dils menaders da partiziun.

Model da direcziun:

Reglamentaziun dallas incumbensas, responsablads e cumpetenzas dalla direcziun communal.

art. 13 Administraziun communal

Model da departaments:

Entginas incumbensas appartegnan directamein all'administraziun communal. Denter auter l'administraziun da persunal, las damondas da sustegn public ni la repartiziun da lubientschas (p.ex. lubientschas da carrar, lubientschas da parcar, lubientschas da cavar cristallas, eav.).

Model da direcziun:

La direcziun ni suprastanza communal ei stada responsabla per quellas incumbensas.

art. 14 Cumissiun da baghegiar

Model da departaments:

La cumissiun da baghegiar vegn cun il model da departaments daniev a prender las decisiuns per damondas da baghegiar tenor procedura ordinaria. El cass da protestas decida la suprastanza communal sch'igl ei buca stau pusseivel da sclarir las divergenzas denter las partidas plascheivlamein.

Model da direcziun:

La direcziun ni la suprastanza communal ha decidiu davart las damondas da baghegiar.

art. 16 Cumpetenzas finanzialas

Model da departaments:

Davart expensas enteifer il preventiv approbau decida il menader da sparta ni il menader da partiziun. Il cau da departament sa da tut temps vegnir consultaus.

Davart expensas ordeifer il preventiv decida il menader da sparta ensemen cun il cau da departament entochen maximal frs. 10'000 per la medema caussa (maximal frs. 20'000 per onn e sparta). Davart expensas che serepetan entochen maximal CHF 5'000 per onn cun consultar il president communal.

Model da direcziun:

La direcziun communal ha giu cumpetenzas finanzialas ella summa da frs. 20'000 per expensas unicas, resp. Frs. 5'000 per expensas che serepetan.

art. 17 Regulaziun da suttascriver

Model da departaments:

Per mintga camp da cumpetenzza vegn definiu las persunas cun il dretg da suttascripziun. Da principi suttascrivan adina duas persunas. Resalvada ei la corrispondenza semplia che sa vegnir suttascretta da sulettamein ina persuna.

Model da direcziun:

Per la direcziun ha il president ensemen cul canzlist communal giu il dretg da suttascripziun.

4. Ponderaziuns finalas

Il niev model departamental pretenda midadas fundamentalas ell'organisaziun operativa ed ellas proceduras da decisiun. Il niev reglament duei possibilitar ina tractaziun sempla ed efficienta dallas numerusas fatschentas da mintgadi e reducir la birocrazia tier la vischnaunca da Mustér evidentamein. Tut las fatschentas che pretendan dapli atenziun, ni ein d'impurtonza strategica, stattan vinavon ella cumpetenzza dalla suprastanza communal. Il brat d'informaziuns a caschun dallas sedutas da cader garantesch la circulaziun d'informaziun era sur ils departaments ora.

5. Proposta

Sin fundament dallas ponderaziuns suramenziunadas
p r o p o n a
la suprastanza communal al cussegl da vischnaunca:

1. dad approbar il reglament «Uorden da fatschentas per la suprastanza communal e per l'organisaziun operativa» cun metter en vigor quel pigl emprem da mars 2025.
2. d'abolir il «Reglament per la direcziun communal», revedius la davosa gada il december 2021, pigl emprem da mars 2025.

Suprastanza communal Disentis/Mustér
Il president: Il meinafatschenta:



René Epp



Roland Cajacob

Disentis/Mustér, ils 3 da fevrer 2025

Annexa:

- Uorden da fatschentas per la suprastanza communal e per l'organisaziun operativa